



Minggu, 1 Agustus 2021
Ogen: Esekiel 9: 1-11



Kudalanken PercutahNdu



Engkai maka kita mehamat man orangtua? Engkai maka Moria mehamat man perbulangen? Engkai maka sirayaken wari raya mbelin bagi kerja rani? Engkai maka kita ku Gereja i bas wari minggu e? Engkai maka mejingkat kita ndahi perpulungen e? Engkai maka kita arus setia man Dibata? La lit jawaben sideban seakatan ban enda perintah Dibata. Kita patuh dengen ndalanken perintah Dibata. Si eteh enda me si ngena ate Dibata adi idalanken bas kegeluhenta. Jadi selaku anak-anakNa patuh kita. Si eteh ulihna pe enggo isikapken Dibata.

Kalak Juda i Jerusalem enggo tuhu mekelek kejahatenna, kuta e enggo tuhu-tuhu meluat. Lanai lit idah Dibata si mehulina. Icurnakenna gelar Dibata alu ngatakenna: "Dibata enggo nadingken Jerusalem seh maka bebas ia ngelakoken si jahat." Emaka ibabo kejadiin si e me Dibata mbalas kejahaten kalak Juda e. Tapi labo kerina ikernekenna kepe, iselamatkanNa kalak si rukur mehuli dengen erndeale ate kerna perkara-perkara kejahaten si enggo ilakoken kalak i Jerusalem e. Kalak si bujur e itamakan perdempakenna cap gelah ola ia ibunuh (ay.4).

Kenca enggo ercap kalak si ngaloken keselamatan e, maka lit perintah man kalak si isuruh Dibata ndai guna munuhi kerina jelma i Jerusalem. Tentu si enggo lit cap i bas perdempakenna ia selamat. Emaka perintah e ialokenna (6 kalak dilaki) idalankenna perintah e alu kepatuhen. Dingen mulih ia alu lapuren: Enggo kudalanken perintahNdu. Si ertina pembunuhan kempak kalak jahat kerina enggo dung idalanken. Janah kuta rikut Rumah Pertoton pe enggo keliamen. Kesainna pe enggo dem alu mayat.

Melala tuhu perintah Dibata si man dalanenken. Si e kerina guna kiniulin kegeluhen, kinitekenta rikut jabunta. Ikut nge kita kalak si erndeale ate kempak kejahaten? Berarti kita me kalak si iselamatkan dengen si ngena ate Tuhan. Amin.